

PAVLVS PP. VI

ad perpetuam rei memoriam

Perantiquum paroeciale templum, quod Blotnicae in Sandomiriensis dioecesis finibus, in Polonia, exstat, artis quidem maiestate merito prae aliis haud paucis excellit, at maiore fama et laude idcirco honestatur, quod B. M. Virginis imago in eo servatur ac pientissime colitur. Ad eam enim christiani populi coetus frequentissimi religiosa itinera iterum iterumque suscipiunt, ut multiplicata obsecratione sibi suisque divinorum munerum copiam precentur. Quibus permotus, Venerabilis Frater Petrus Galebiowski, Episcopus titulo Paritarius idemque Administrator Apostolicus dioecesis Sandomiriensis, vota quoque cleri populiue fidelis significans, Nos rogavit ut imaginem illam pretioso diademate, Nostro nomine et auctoritate sineremus redimiri. Nos autem, collatis consiliis cum Sacra Congregatione pro Cultu Divino, precibus huiusmodi libenti animo statuimus obsecundare. Itaque hisce litteris atque auctoritate Nostra apostolica, eidem Venerabili Fratri, quem diximus, partes committimus, ut imagini B. M. Virginis, quae in sacra aede loci vulgo Blotnica colitur, die suo arbitrio eligendo, inter Missarum sollemnia pretiosam coronam Nostro nomine et auctoritate imponat, iuxta ritum formulamque praescriptam. Nos vero minime dubitamus, quin haec sacra sollemnia in religionis bonum populiue spirituale emolumentum cedant; pariterque fore confidimus, ut eius paroeciae cives, quin immo totius dioecesis Sandomiriensis christifideles ad Beatissimam Dei Genitricem venerandam magis magisque incitentur. Contrariis quibusvis nihil obstantibus. Datum Romae, apud S. Petrum, sub anulo Piscatoris, die IV mensis Decembris, anno MCMLXXIII, Pontificatus Nostri undecimo.



Ioannes Card. Villot

Secretarius Status

